

Lungzswng: Beixnuengx Yauzcuz Angqhoh Ciet Vwnzva Gocaz Geq

Ndwen 4 ngoenz 20, dwg liggaueq ciethiq goekhawx, Lungzswng Gak Cuz Swciyen Lungciz Cin Cunghluz Cunh banh ciet vwnzva gocaz geq, beixnuengx Yauzcuz dangdieg youq ndaw suen caz eu fwencaz、diuq fouxcaz, caemhcaiq doenggvaq guhhong langhbaij gij ginggvaq dajndaem caeuq mbaet gocaz geq Lungciz, yinx ndaej haujlai bouxyaez vwnzva caeuq bouxhek daeuj daejniemh.

Geij bi neix daeuj, Lungzswng Gak Cuz Swciyen mboujduenh gyalai gij ligdoh baujhoh caeuq haifat gocaz geq, cungfaen vatcimh gohyoz、lizensij、vwnzva caeuq canjnieb gyaciz de, haenqrengz dajcauh gij binjbaiz gocaz geq, caemhcaiq doenggvaq “gocaz lijyouz yungzhab” doicaenh gij canjnieb mbawcaz hwngfat cangqheiq, hawj engq lai vunz doenggvaq hwngfat gij canjnieb gocaz geq saedyienh laisou baenz miz.

(Banh Cisiengz/潘志祥)



▲ Dabsau Yauzcuz youq ndaw suencaz mbaet mbawcaz.



▲ Beixnuengx Yauzcuz langhbaij ndaem gocaz.



▲ Vunzmbanj cingq ganj mou iq buet vaiq doxdax.

Yungzsuij:

Youz Miuhhoih Coux Goekhawx

Ndwen 4 ngoenz 20, dwg ciethiq goekhawx, Yungzsuij Myauzcuz Swciyen Siujyungz Cunh Mbanjihdung guh aen hozdung sixmiuh baujging “cin geq gyaundeih • Sihdung vuenyungz”. Geij cien boux Myauz、Yauz、Dung daengj beixnuengx gak cuz caeuqfaenh duzmou senj lengj、mou iq buet vaiq doxdax、fwngzbyouq gaemh yienz doxdax caeuq aen yizsi caeqbaiq daengj hozdung lai yiengh, angqcoux “goekhawx” daeujdaengz, muengh fwn yinz rumz swnh、haeuxgwn fungsou.

(Lungz Linzci/龙林智)

Bae Hoihfwen Senhconz Gimq Doeg

Ndwen 4 ngoenz 19, dwg ciet hoihfwen cienzdoengj Ningzmingz Yen Dugh’anh Yangh Luzcang Cunh ndaej bak bi lizensij haenx, vunzlai mbanj henzyawj doxcomz angqhoh aen ciet neix, Ningzmingz Yen Ginduzban gaemdawz aen seiz-gei neix, cujciz segungh gimq doeg、bouxgagnienh gimq doeg、canghfwen Bouxcuengh caeuq doih yienjheiq ndawbiengz daengj, bae daengz hoihfwen Luzcang Cunh guh gij hozdung gyauyuz senhconz gimq doeg hingzik lai yiengh haenx, hawj vunzlai daeuj caeuqfaenh hoihfwen haenx angqhoh ciet hoihfwen doengzseiz hix ciep ndaej gimq doeg cihsiz gyauyuz.

(Cauh Yizganh Nungz Ying/周贻刚 农映)



▲ Doih yienjheiq yienj diuqfoux 《Dujva Sengmingh》 ndaej vunzlai haenggyaez.

Ciet Yauzcuz Guh Senhconz Ndei



▲ Bouxguhong senhconz faplwd meh-mbwk henhoh gienzik hawi vunzmbani.

Ndwen 4 ngoenz 19, dwg ngoenzciet Yauzcuz Lingzyinz Yen Cauzlij Yauzcuz Yangh Bwzcauz Cunh, yangh ganbu yungh aen seizgei vunz comz neix laeb daiz guh senhconz faplwd fapgvi dwkcawz bangvunz simnduk、meh-mbwk henhoh gienzik daengj, daezsang gij yisiz faplwd vunzlai, hawj gyoengqde gaenxmaenx byoengq gij rizsienq famhfap famhcoih bangvunz simnduk okdaeuj.

(Loz Hihhaij/罗希海)